

**NAMIBIA SENIOR SECONDARY CERTIFICATE**

**FIRST LANGUAGE OTJIHERERO ORDINARY LEVEL**

**4107/1**

PAPER 1 Reading and Directed writing

2 hours 30 minutes

Marks 70

**2019**

Additional Materials: Answer Book

**INSTRUCTIONS AND INFORMATION TO CANDIDATES**

- Write your answers in the Answer Book provided.
- Write your Centre Number, Candidate Number and Name in the spaces on the Answer Book.
- Write in dark blue or black pen.
- Do not use correction fluid.
  
- Answer **all** questions.
  
- Pay attention to spelling, punctuation and sentence structure.
- The number of marks is given in brackets [ ] at the end of each question or part question.

**OMARAKIZA NONDJIVISIRO KOVARORWA**

- Tjanga omaziriro woye mEmbo rapeke ndi mo pewa.
- Tjanga Onomora yOsenda, Onomora nEna rOmurorwa kEmbo rOmaziriro.
- Tjanga nopena omburau poo onḡorozu.
- O ungurisa ouhwe ouyerise poo otipekisa onḡemise.
  
- Zira omapuriro **ayehe**.
  
- Yandja ombango kondjangerosemba, oviraise vyokuresa nondungiro yomihewo.
- Otjivaro tjozongombe tja yandjwa moukovero [ ] komaandero wepuriro poo orupa rwepuriro arihe.

This document consists of **6** printed pages and **2** blank pages.



**Republic of Namibia**

**MINISTRY OF EDUCATION, ARTS AND CULTURE**

## ORUPA A

Resa ehungi ndi nawa nu kuzambo u zire omapuriro ayehe ngu maye teza ku ro.

### Okarukondwa 1

#### Onyonokero yovature va Afrika mbe tjindira komahi wokongurova

Ovihuro vya Europe nambano vya rira omaturiro kozomiṭiri ozonandjiviro nḡaaze hongo kozoyunivesiti tji za ri mo-Afrika nambano nḡe ungura otjzosikuriti. Ovahonge ve isa ozombongo zavo mombambaukire nave karira ovahinge vousaru movihuro vya Europe. Ovakazendu mbaave randisa omitwaro pekepeke nooupana, outara wavo ve wesa nao ve ri kovihuro vya Europe oku ve komba nokukoha ozondjuwo. Hapo ovikwaye mbi ri kongotwe yorutjindo ndwi?

Ombura aihe, omayovi nomayovi wovature va Afrika ve ritwa moumba mondando yokukapaha ehupo ndi mari ngara ewa ko-Europe. Otjihihamise mu avihe, ovarumendu ve isa ovakazendu novanatje kombunda mohangauti nave kapaha ku mave munu ombwiro. Momuano otjingewo ovakazendu otji ve isa ovarumendu mbe hi noviungura novanatje vozondjara nave taurire kovihuro vya Europe mondando yokukatjinga otjimariva otjinamasa hi oeuro vari.

Tjii hapo atuhe otjovanene, tu nousemba okuimbirahi ovanatje vetu mokuyenda kouye wopendje okukapaha ouye warwe mbu ri moturoto twetu porwatwo okuisira ku imbi mbi tu zuva. Imbwi omuano wokuhendeka varwe. Nu mena rokutja tu hupa mouye womuinyo mbu ha ṭeki pamwe, woruzungo nu wokuvanga okutumba hakahana, ovengi otji ve riyandjera okuritwa momauzeu, okupandjarerwa nokuṭukuṭuka mominyo mokuriisapo pomize vyavo nokukauta omuinyo omupe mbu ve hi nokutjiwa nu motuveze otuhinandjiririsa, ovo mu ve sokukondja nomasa okuungura oukukutu okukapita mba ovature.

Otja imba ombwiko yekoverwahi ra Afrika pu mai vete ongoro mehi, ovature va Afrika opu va uta okutoorora nozombaze nozopaspota zavo komeho yokutoororera mouwongo womatoororero. Oouatjiri au horoka kutja orukongo ndwi karu nombatero. Okukavaza ko-Europe, tjiva vovature vomahi wa Afrika ve sokutuurungira mokuti onguza nu okunaumba kwa Maroko.

Imba mbe ri ovaṅingandu ve kavaza mo-Ceuta, okarukondwa ka Spain ku ke ri komukuro wokuvare kwa Maroko. Imbo opu ve ṭizirwa momapando okuundja okurondorwa kokuhita mo-Spain nokuhina ousemba. Omaṭupa waimba ovahumandu ye rimbara mokuhina okutjiwa kutja owoowaṅi naye kayanda kehi mokuvare ngwi o-Metitereniyena. Ovataure avehe mba kutja ovapahe vokumuna ozombwiro nomauwa ngamwa, kutja ovo mba overitwe vomoumba na mbe yenda na ngamwa ozondando okukavaza kwavo ngwina omozondjise za Ndjambi nokutja ove omuini wa kondwa komungeti. Ovo ve hepa ounongo wokurivatera oveni, okukara nombango yakatjootjiri, okuriyandjera okuungura oukukutu nokuhina okuhwindḡa, okurizembisa ku wa za nokuhungama omuinyo omupe.

Nambano pe munika ongaro ombe yomeritjindiro movandu va Afrika. Ovataure mbe za ko-Afrika moruveze rwanambano kave ire okukapaha omahongero otja tjaave tjiti rukuru, nungwari ve ira okukapaha ozoeuro tji tji ri otjimariva tjondengu yokombanda tji mo sasaneke ku na ihi otjomahi wavo. Otjingi tjovandu va Afrika popengi ve nanukirwa i yokuyenda kovihuro vya Europe okukaungura kutja ve pwike ovimariva ovingi nonḡero yokuyekutanaura ehupo ravo tji va kotoka konganda. Nu tjinga ihi otjimariva atji nanukirwa i yovandu avehe mouye otji pe hi nombangu kutja ovandu vomuhoko uṅe poo votjiwondo tjine.

Ovataure mba ovape mba ombe ri ovandu mba muna ombwiro osemba mouye nambano mbwa wana mbwa rira umwe. Moure wozoiri 36 tji wa vaza movihuro vya Europe, pe noupupu okuuta omuinyo omupe otjomuyakure wovayenda mohotera yozonyose ndano. Nokutja ve muna ondjambi yokehi, oupupu okutona otjomuyakure wovayenda mohotera movihuro vya Europe tji mo sasaneke ku nehupo mouresevate, ouhuro na movihuro ovinene vya Afrika.

Ove mo tja nao ndji kandjora nai kutja ovandu va Europe va handjisiwa i yovataure va Afrika mbe yendera okuungura oviungura mbi mbi he ri ovinandengu. Ovature va Europe imba ovasyona na mbe hi noviungura ve kuminina mba mbe hita momahi wavo nokuhina ousemba kutja ombe ve humaparisa. Tjiva vaimba mbe hupa ehupo ropokati otji ve takera ovataure va Afrika, mbe hi na otjipeni na tjimwe, ominwe tjinga ave muna kutja ovo ombe yeta omayerurukiro wozondjito ozombi momaturiro wavo.

Omahi omengi wa Europe ya uta okutwapo ozoveta ozondeu tjinene nde notjina nomahitiro wovandu momahi mongondjero yokuteya ongaro ndji ri movandu va Afrika mba urwa, ovasyona na indji ombunga aihe ndji taurisiwa i yehupo okuyenda ko-Europe. Omahi omengi wa Europe, ndi ri ekoverwahi mu mwa utirwa ounongo novandu okupaturura omeho, okuza ko-Ceuta komukuro wokuvare kwa Maroko, nga koukoverwahi wa Norway, ya tya okuripatera ku wo oyeni mokuritungira ozondarata mbari ozondjaere nu zozosipe ozondwe otjotukurure nga koviungurisiwa vyotutjeno mbi mwina ko ovandu mbu mave yende.

**1** Okuzira omapuriro **(a) – (c)** ove mo hepa okutjanga oretera ndji pu pe neziriro esemba porwayo.

**(a)** Omutjange ma munu kutja ouzeu ounene mbu yetwa i yovandu okutaura u ya ...

**A** komatund'u.

**B** kotupa twomahongero.

**C** kozombwiko zomahi.

**D** kozongamburiro.

[1]

**(b)** Omutjange ma raisa kutja ovandu ve tjinda mena rokutja va tura ...

**A** momahi nge nanwa neke rotjitenda.

**B** momahi nge ri mokuritunga.

**C** motuveze otuhinandjiririsa.

**D** mouye ounauhendi.

[1]

**(c)** Ehungi mari raisa kutja ovataure ve muna ombwiro mena rokutja ...

**A** kave tji tura mozoresevate rukwao.

**B** ovengi ve yenena okuyaruka kozonganda.

**C** tjiva ve yenena okumuna ombwiro moruveze rwatjimanga.

**D** ve karira ovatumbe okukapita ovengi vovature va Europe.

[1]

**(d)** Omutjange ma heye vi tji ma tja, “ovature va Afrika opu va uta okutoorora nozombaze nozopaspota zavo komeho yokutoororera mouwongo womatoororero”? Yandja omapu **yetatu**.

[3]

- (e) Omutjange ma vanga okuturaera kutja vi tji ma tja, “omozondjise za Ndjambi nokutja ove omuini wa kondwa komungeti”? Tamuna **omapu yevari** nu u seturure **momambo woye omuini**. [2]
- (f) Seturura kutja ongwaye omutjange mokarukondwa oketja-8 tji ma raisa aayo ndji ondjora. Tamuna **omapu yevari**. [2]

[10]

- 2 Risenginina aayo ove oove omuungure morupa rwomahitiro nomapitiro wovandu mehi. Ove wa nangwa okukahungira pu imwe yozosikore mokarukondwa koye poo posenda yotjiwana. Tjanga ehungi ndi mo kahungira mu mo ve tjivisa ohunga noumba wokuyenda ko-Europe nokuhina ousemba.

Mehungi roye seturura omuano ovandu mbe taura mo-Afrika mbu ve:

- ritikonaparisa oveni
- riputura pomize vyavo pu va za
- ritwa moumba oveni

Ungurisa ondjivisiro ndji ri mEhungi 1 tji mo tjanga ehungi roye.

Oure wehungi roye nga rire omambo pokati ko-**200 – 250** nao.

[20]

## ORUPA B

Resa ehungi ndi nawa nu kuzambo u zire omapuriro ayehe ngu maye teza ku ro.

### Okarukondwa 2

#### Ehungi romutanda wa Afrika ngwa taurira ko-Europe

Omutanda wena Ahmedu wa vaza mo-Sicily komaandero wokupepera kwombura ndji 2014. Omuzandona Ahmed Jalo wozombura 16, ngwa za kehi ndi o-Gambia, pe mu kambura ombura nomieze vivari okuvaza potjikuturiro tjososkepi tja Sicily mo-Catania. Mombapaiziro yeho, ovaungure vomahitiro nomapitiro wovandu mehi arire tji ve mu yeka oundu we otjomundu nondangu ye nave mu vara otja “omuhinausemba” okukara mehi ndo. Okuvarwa nai, kwe mu twa moubu. Eye nao tjandje wa rire omundu omuhayakurwa kotjiveta na motjiwana mo-Europe. Ovaungure ovatwe ovanavihakoko vyokombanda tjandje nambano nai mave yenene okumuhumba nokumupakura koviwana vyavo ngunda amave kondjo oukukutu okumuyarura ko-Afrika.

Tja za nokuheruka mo-Europe, aa utuka oraurau motupanda mo-Catania, otjihuro otjitjavari kounene mo-Sicily. Kwa ri notjikaka, nu eye ka ri nozombanda zoupyu. Eye aa savasava movikatinga okupaha ovikurya nu otjaa nu omeva omengi kutja nani maye ramba ondjara. Eye atja sokutja wa tombepera nga tja koka andakuzu ka ri omundu rive omunatjari, omuture wa Sicily, ngwe mu raera omoska ndu ri oruveze rwongumbiro rwOvamoslema ovandu mu ve yenena okukawama.

Ete mbo opu twa hakaenena na Ahmedu omayuva omatiti kombunda yanao. Oimama ngu ri omuhonge wOvamoslema, Omuaraba wohange nu wondjiririsa, we tu ryangisa mu indwi oruveze ndwi aruhe. Ahmedu, otja paape tjiti ovataure varwe mbe yere mbo komurungu we, aa vatere okukohorora ndji omoska otjokuraisa ondangu kombatero ndja pewa. Pa ri notjina tjimwe ohunga na ye tji tje ndji tuna. Eye wa ri nombuniko ombwa yapeke, omuano mbwaa wongo orutu rwe. Ouyenda we oure okuza konganda kau tukuturire ombuniko ye nongamburiro ndja ri na yo mu ye omuini. Nangarire mohangauti ye nozombanda ozondjazema nu nda sasauka eye nda ri aa zara, Ahmedu wa ri aa kurama notjikombo meke re otjomurwe wovita ngu nenga. Ami mba ryama ku ye nu e mu hungirisa. Eye aa munika okuritwara peke nu aa rongerere okuriyeura. Tji mbe mu pura ena re, eye we ndji raera ro nu momuano mbwaa raisa aayo eye ma hungire ku nomutengwandu. Kuzambo ami otji mbe mu raera ame metamea kutja ami wina owami Ahmed. “Kakutja nao oweete tuvemwe,” ami mbe mu raera nao. Pemwe nao tjimuna ngwaa vanga okumetamea nungwari ka ri oukahu nawa.

Kehi yombuniko ye, ami mbe ya pokumuna kutja eye wa ri omurumendu wapeke nu ngu nehungi rapeke ndi ma yenene okuserekerera. Ami mba ri ambe rirongerere okuhungira ku na ye, posiya eye wa za po poruveze ndwo tjimanga nu tji twe ya eyuva ndi ependukirwa himba ri nongamburiro kutja mape ya eye a kara mbo. Ngunda amatu rongerere okuyenda, eye otje ya. Eye kaa vanga okuhungira. Ovandu mbe hita momahi nokuhina usemba ve tjiwa kutja okuhungira ku novandu mbu ve he i mape ya aku ve wisire mondomo. Nungwari ete katu umbire ohama. Ete otji twa uta ehungi retu ere ku na Ahmedu eye ngwa ri mombameno. Ingwi omuhonge wOvamoslema wa ri aa haama mbo pu na ete, aa zu po oruveze orusupi ndi tji ma kazira ongoze nu otjaa tono eho koiri ye tjimuna ngwa kumwa kutja nu tji ndi eyeye enyingi nai ohunga nomutanda ngwi oratjike.

Ahmedu we tu raera kutja eye ongu ri omuzandu otjiveri nu eye okukuriserira ovanene ve nu wa kwatwa pu na varwe vane. Eye wa ri nondando yokuyekuungura oukukutu kutja ma mune otjimariva kutja ma kotore ovanene ve pamwe mba hanika nokuvatera ovangu ve. Eye aa tja, “Ami mbi vanga okutoŋa kutja mbi yorokise eŋundu retu.”

Ihe we mu sera ondaya nu eye arire tja hiti mouyenda mbwa kasana owokuyenda kotjovasengwa nokuhina ozondokumenda poo ovimariva, okutuurunga o-Afrika ndja tandavara, ama kapitira momahi nga o-Senegal, Mali, Burkina Faso, Niger na Lybia. Ahmedu aa zemburuka otuveze otuzeu ma tuurungira mouyenda we, otuveze tjiva pa patererwe mondeko i yovaporise ovanatiku nomihiamo mbya muna korutu rwe motjimbe tjondjara. Pa ri novikando tjiva eye mbyaa yenene okuhupira komeva porwawo. Tji pe noupupu, aa yenene okuungura otjomuvatere womuhore wozondjise, okuteka omeva, okuhavarisa ovikurya, omuano mbwi ombwaa mu pe ovimariva mbya yenene kutja ma kaende komurungu nouyenda we. Eye tjinene aa kondjo kutja ma kare nomuinyo, e hi nokutjiwa kutja ma kayenda ruŋe komurungu nouyenda we tjaa ma kavaze ka tandere ku ku ri ko-Europe.

Eye aa zemburuka ondomba youyenda we woruzungo indu eye tja tumbirwa mokayaha okaŋi ku ke ha ri nomututu pamwe novakwao ape 100 nao komukuro wokuvare kwa Afrika komanene, eye pa hara okuŋiwa i yomeva. Ovaronde mba va ri mondjira okuyenda ko-Europe nokuhina ovimariva nozombapira zousemba. Ovo kava ri notjiŋa tjarwe pendje na ihwi oturoto twaatu ve hingi. Omeva ya ri omahaŋa nu imbi ovikurya aavi tjata opetrora. Ahmedu wa toora ouvere. Tjimanga okayaha ka topoka nake utu okuhitwa i yomeva. Okutja ovaronde va ningirwa okuungurisa outjuma wavo womeva okuhupura omeva kutja okayaha ake ha tomwine. Ahmedu ngwa ri aa tombepera nondjara nu aa puruka we yekuyamwa i youhonapare outjevere wokuvare wa Italy nu arire tje kerimuna e ri mo-Sicily.

Tji mbe mu pura kutja otjikwaye tji tje mu pa omasa okukaenda komurungu, eye wa tamuna ongamburiro ye posiya kombanda yanao ya ri omeripura nga wokutjita otjiŋa tji matji vatere omuhoko we nokukotora ovanene ve mba hanika pamwe rukwao.

Okuhungira mbu ri ouatjiri, o-Europe ya hungamwa i youzeu onunene wovataure mbe hita nokuhinandjandero. Ongaro ndji mai zundakere ko tji mo isire kokuhinandjikameno ku ku ri mo-Afrika, oyo ndji ri ongaro ndji taurisa ovanu, nu tji mo tara ndji hi nomayarukiro wombunda. Pe sokutuwapo omazeva ngu maye yeta amazengururiro omakarere nu ngu maye ripurire kovandu nondjenda. Okuzepaisa ovanu mokuvare kwa-Metitereniyena poo okuvenikizira mondjara na mohangauti morupanda kandi ri eziriro.

- 3** Woronganisa ozondero nomauzeu ovataure mbe za ko-Afrika okuyenda ko-Europe mu ve kerihaka otja tji vya handjaurwa momahungi pouvari wawo. Ungurisa ondjivisiro okuza momahungi pouvari wawo okutjanga eziriro roye.

Oure womboronganisiro yoye nga rire omambo pokati ko-200 – 250 nao.

**[20]**

- 4** Risenginina kutja ove wa ri Ahmedu nu u tjange orutuu ku iho mu mo mu serekarere ohunga nomeero woye motjikuturiro tjososkepi tja Sicily hi o-Catania. Ungurisa ondjivisiro okuza mEhungi ndi oritja-2 amoi tunu nokuiputaputisa nawa momuano wokumema nu amo ungurisa omeripura woye omuini.

Oure worutuu rwoye nga rire omambo pokati ko-200 – 250 nao.

**[20]**

**BLANK PAGE**

**BLANK PAGE**

